

Personal di Cas di Aruba y ATA Europa cu ceremonia pa recorda Betico Croes



DEN Haag –Personal di Cas di Aruba y ATA Europa a tene awe diamars 24 di Januari 2012, na vispera di Dia di Betico, un ceremonia pa recorda e fecha di nacemento di Sr. Gilberto François “Betico” Croes, politico y estadista Arubiano.

Director interino di Cas di Aruba Sra. mr. Shandra John a cuminsa na disculpa Minister Plenipotenciario Sr. Edwin Abath di no por ta presente na e ocasion aki pa motibo di un biahe di trabao na Bruselas pa reunionnan.

Den nomber di e mandatario Sra. John a hiba palabra. ‘Nos ta para na antesala di celebracion di e fecha natal di Sr. Betico Croes. E dia aki ta duna nos e oportunidad pa para keto na e memoria di un gran yiu di tera y un gran

politico. Ta aki na Den Haag na 1983 di e siglo pasa cu durante di e Conferencia di Mesa Rondo, Aruba a logra di haya su Status Aparte.

Esaki tabata e vision di Betico Croes y tur e otro lidernan politico prome cune. Un pais soberano y determina pa stipula su mesun destino.’

Sra. John a sigui bisa cu mirando ariba e 26 aña cu a transcuri nos Gobierno actual a cuminsa na stipula e rumbo nobo cu Aruba lo bay sigui den e añanan cu ta bin. ‘Un rumbo nobo basa ariba desaroyonan innovativo y atencion pa e medio ambiente. Pa futuro ta hopi importante pa reforsa e fundamentonan den nos comunidad, ta pesey Gobierno ta inverti miyones pa drecha

nos barionan, rebiba centro di Oranjestad, San Nicolas y vecindario, restaura nos edificionan historico y traha ariba e problema di nos infraestructura. Asina Gobierno kier haci di Aruba un isla mas confortabel pa biba.’

‘Awe na vispera di celebracion di Dia di Betico ta un bon momento pa reflexiona ariba e persona Betico Croes. Un persona social y masha stima den comunidad, cu a logra trece unidad den e pueblo di Aruba. Laga esaki ta un inspiracion pa nos tur,’ asina Sra. John a termina su discurso. Despues di esaki Sra. John conhuntamente cu Sr. Elton Barbour di ATA Europa a pone un flor na e busto di Betico Croes. E ceremonia a termina cu cantamento di nos himno nacional ‘Aruba Dushi Tera’.